

Wiehnachtsinkoop 2020

Moin Frauke, hier is Meta. Wat en Glück, dat ik di futt an de Stripp krieg! Du, Frauke, Jan un ik sünd vanmiddag in Auerk, wi willen al maal en paar Saken för Wiehnachten inkopen. Nu stahn wi hier in de Footgangerstraat un bruken nödig en Toilette, man de Cafés hebben all dicht un wi hebben bit nu noch kien Henwies up en Toilette funnen. Hest Du en Tipp, waar wi hengahn kunnen?“

„Laat mi overleggen. De Toilette in de Parkgaraag unner de Marktplatz, naja, daar kannst Du bestenfalls Jan henstüren, för di is dat nix. Mmh. Ik wohn woll in Auerk,

man daar mutt ik ok eerst overleggen. Ach ja, in de Carolinenhoff, in de eerste Etaag, tegenover van de Plünnenladen, daar giff dat Toiletten för elk un een.“

„Dat is ja hunnert! Allerbesten Dank, Frauke, daar hest Du uns en bült mit hulpen. Hör even, waar ik Di nett an 't Telefoon hebb, daar is noch wat: Ik kann nich good lang rumstahn un kieken, denn krieg ik dat alltied so in de Rügg. Un dörklöömt bün ik ok al. Waar kann man sük denn hier maal eevkes hensetten un verpuusten, in Warmte. Ik meen – en bietje langer as daar boven in de Carolinenhoff...“

KOLUMNE

Moin, Moin
Schrievers Sprak
allerbest moje
Pläseer **Vertellsel** hoop
Smüstern

Platt maakt

„Ik seh al, ji hebben en recht mackelke Wiehnachtsinkoop! Also, ji kunnen kieken, of de Lambertikark open hett. Dat lohnt sük alltied, dat 'n sük de moje Altaar ankickt. Of ji blieven in de Carolinenhoff en Settje sitten,

daar stahn Banken in de Gangen unnern. Un wenn dat all nix brengt, können ji bi mi komen to upwarmen un na de Peer kieken.“ „Besten Dank för dat Angebot! Man wi sünd mit uns Böskuppen noch nich klaar. Wi sölen uns nu woll to helpen weten. Un wenn wi anner Week na Leer fahren to inkopen, frag ik vördeem rum, waar man sük even en bietje hensetten kann un waar dat daar opentlike Toiletten giff. Frauke, wees bedankt un bit bold maal weer! Tschüss.“

Jan schüddkoppt un seggt: „Ik weet noch neet, of ik anner Week würrrelk na Leer to inkopen fahr. Daar is mi echt

de Grapp van of.“ Meta laggt: „Wi weten nu ja, waar wi uns up vorbereiden mutten. Problemen sünd dafür daar, dat se lööst worden.“ „Ik will bi uns Wiehnachtsbummel aver keen Problemen lösen! Dat is doch keen Wunner, dat de Lüü nu mehr un mehr in 't Internett kopen. De Kooplüü proten all over Wiehnachtsmarktuden, daarmit mehr Minsken in de Stadt komen to kopen. Man dat Nödigste geht alltied noch vör dat Drockste“, brummelt Jan. Meta treckt hum bi de Arm. „Koom, wi gahn nu eerst maal na de Carolinenhoff un kieken, wat dat daar Mojes giff!“



Cornelia Nath